

Amós

¿Chacra runata Tayta Dios acranmanchuraj willacuyninta willacunapaj?

¿Pitaj **caran**? Amós ninan caycan «carga» ninan u «aparej» ninanmi. Pay caran chacra runami Jerusalenpa sercan Tecoa marcapita.

¿Maychötaj **willacuran**? Amós Judá runa caycaptinpis Tayta Diosga gayaran norte nasyun Israelcho willacunapämi.

¿Imaytaj **willacuran**? Pay willacuran Samariacho guepa caj Jeroboam ray caycashan-wichanmi (783–743 a.C.) y Jerusalenco Uzías ray caycashan-wichanmi (792–740 a.C.).

¿Imataj **caycan cay libracho**? Chacra runa captin manami fäsichu caran norte caj nasyunpa capitán Samariacho willacunapaj. Pay willacuran ríccunapa faburnillan mandajcuna mana cananpaj, pobricunata mana ñacachinanpaj. Amós willacuran ima mana allita ríccuna ruraycashan-tapis. Chay runacunaga guellaywanmi jueztapis rantirej. Amosga piñacuran mana rasun dioscunata adurashanpita y chay dioscunata adurananpaj rurashan particunacho Tayta Diosta adurashanpitami. Chaymi Israelcho caj cüraga garguran. Wañuchiyyta munashpan ollgöparan marcanman cuticunapaj (7.10–13).

Chaynöpis cay libracho caycan castigu chayamunanpaj cashanta pichga cuti ribilashan (7–9). Ushanantaga willacuyca Tayta Dios salbananpaj cashantami (9.11–15).

Gallaycunan

¹ Tecoa marcachömi tiyanan Amós jutiyoy runa. Payga uyshayojmi caran. Tayta Diosga Amosta caycunatami willaparan Israelcunata willapänanpaj. Chaytaga Amós willacuran Uzías* Judäpa raynin caycashan wicanmi. Israelpa rayninna caycaran Joaspa wamran Jeroboam.* Chay willacushanga caran fiyupa timlur cananpaj ishcay wata pishiycaptillanmi. ² Cayno nirmi Amosga willacuran:

«TAYTA DIOSGA Sión lömapita liyunnomi gaparämur.

Jerusalenpitami busninpis junrurumun.*

Chauraga jircacho caycaj guewacunapis wañuytacäcumi.

Carmelo puntapis chaquicäcumi.

Israelpa bisinun nasyuncuna jusgasha cananpaj cashan

Siriapa contran

³ «TAYTA DIOSGA caynömi nin:

«Damasco siudä runacunaga* fiyupa aypallatanami mana allita rurasha.

Galaad runacunata* alläpanami ñacachisha.

Imanömi ríguta éran fyérru éracunawan, chaynömi rurasha.

Chaypitami castigänillataga mana cachaycushächu.

⁴ Ray Hazaelpa familyancuna tiyaycashan wasimamni ninata sindipaycushaj.

* **1:1** 2Rey. 15.1–7; 2Crón. 26.1–23 * **1:1** 2Rey. 14.23–29 * **1:2**

Jer. 25.30; Joel 3.16 * **1:3** Isa. 17.1–3; Jer. 49.23–27; Zac. 9.1

* **1:3** 2Rey. 10.32–33

Chay ninami ushacurcongapaj ray Ben-adad
tiyaycashan palasyutapis.*

⁵ Damasco siudäman yaycuna puncu rancaraycaj-
tapis callpaycurmi amirishaj.

Avén guechwa pampacho mandaycajtapis
illgächishämi.*

Chaynömi rurashaj Bet-edén siudächo mandaycaj-
tapis.

Siria runacunatanami nasyunninpita prësu
apanga Kir partiman.»

TAYTA DIOSMI chayno nisha.

Filisteapa contran

⁶ «TAYTA DIOSGA caynömi nin:

«Gaza siudä runacunaga fiyupa aypallatanami
mana allita rurasha.

Paycunaga juc nasyun intëru runacunatami prësu
apacuran.

Nircorga Edom nasyunman ranticaycäriran uy-
way cananpaj.

Chayno rurashanpitami castigashaj.

⁷ Gaza siudäpa curral pergancunamanmi ninata
sindipaycushaj.

Chay ninami rupar ushacurcongapaj palasyuncu-
natapis.

⁸ Asdod siudächo mandaycajtapis illgächishämi.

Chaynömi rurashaj Ascalón siudächo mandaycaj-
tapis.

Llapan munaynëwanmi castigashaj Ecrón siudächo
tiyajcunataga.

* **1:4** 2Rey. 13.3 * **1:5** 2Rey. 16.9

Chayno castigaptëmi jucnaylla gueshpejllapis Fil-
isteña nasyun runaga wañonga.»*
TAYTA DIOSMI chayno nisha.

Feniciapa contran

⁹ TAYTA DIOSGA caynömi nin:

«Tiro* siudächo tiyaj runacunaga aypallatanami
mana allita rurasha.

Paycunapa juchancunaga caycan juc marca intëru
runacunata Edom runacunaman uyway
cananpaj ranticushanmi.

Manami cumliranchu alli goyananpaj parlashanta.
Chaypitami castigänillataga mana cachay-
cushächu.

¹⁰ Tiro siudäpa curral pergancunamanmi ninata
sindipaycushaj.

Chay ninami rupar ushacurconga palasyuncu-
nata.»

Edompa contran

¹¹ TAYTA DIOSGA caynömi nin:

«Edom* nasyuncho tiyajcunaga aypallatanami
mana allita rurasha.

Paycunaga famillyan Israelcunatami mana cuya-
paypa gaticacharan sablinta aptacarcärir.

Fiyupa chiquishpanmi chayno ruraran.

Chaypitami castigänillataga mana cachay-
cushächu.

¹² Temán siudämanmi ninata sindipaycushaj.

* **1:8** Isa. 14.29–31; Jer. 47; Eze. 25.15–17; Joel 3.4–8; Sof. 2.4–7;

Zac. 9.5–7 * **1:9** Isa. 23; Eze. 26.1–28.19; Joel 3.4–8; Zac. 9.1–4;

Mat. 11.21–22; Luc. 10.13–14 * **1:11** Isa. 34.5–17; 63.1–6; Jer.

49.7–22; Eze. 25.12–14; 35.1–15; Abd. 1–14; Mal. 1.2–5

AMÓS 1:13

v

AMÓS 2:1

Chay ninami rupar ushacurconga Bosra siudächo
caycaj palasyucunata.»

Amonpa contran

¹³ TAYTA DIOSGA caynömi nin:

«Amón* nasyuncho tiyajcunaga aypallatanami
mana allita rurasha.

Paycunaga nasyunninta jatunyächiyta
munaywanmi

Galaad warmicunatapis gueshyaj caycajta
pachancunata gashargäriran.

Chaypitami castigänillataga mana cachay-
cushächu.

¹⁴ Rabá siudäpa pergancunamanmi ninata sindi-
paycushaj.

Chay ninami palasyuncunata rupar ushacur-
conga.

Pillyar gaparpaycaptinmi ninaga ushang.

Manchariyapaj löcu wayra caycaptinmi ushang.

¹⁵ Rayninnami mandäshejcunawan iwal prësu ay-
wanga juc-lä nasyunman.»

TAYTA DIOSMI chayno nisha.

2

Moabpa contran

¹ TAYTA DIOSGA caynömi nin:

«Moab nasyuncho* tiyajcunaga aypallatanami
mana allita rurasha.

Paycunaga uchpayänanyajmi rupachiran Edompa
rayninpa tulluncunata.

* **1:13** Jer. 49.1–6; Eze. 21.28–32; 25.1–7; Sof. 2.8–11 * **2:1** Isa.
15.1–16.14; 25.10–12; Jer. 48; Eze. 25.8–11; Sof. 2.8–11

Chaypitami castigänillataga mana cachay-cushächu.
² Moab nasyunmanmi ninata sindipaycushaj.
 Chay ninami rupar ushacurconga Queriot siudächo caycaj palasyucunata.
 Pillyacho gaparpaycaptin, trompëtacunata tucarcaycaptinmi
 Moab runacunataga wañuchir ushacächenga.
³ Chay nasyunpa raynintapis mandäshejnincunatapis wañuchishämi.»
 TAYTA DIOSMI chayno nisha.

Judäpa contran

⁴ TAYTA DIOSGA caynömi nin:
 «Judá nasyun runacunaga aypallatanami mana allita rurasha.
 Paycunaga manami wiyacushachu yachachicuynëcunata.
 Laynëcunacho niycashancunatapis manami cäshachachu.
 Chaypa ruquenga papänincuna adurashan iđulucunallatami adurasha.
 Chaypitami castigänillataga mana cachay-cushächu.
⁵ Judá nasyunmanmi ninata sindipaycushaj.
 Chaynami rupar illgarachenga Jerusalencho caycaj palasyucunata.»*

Israelpa contran

⁶ TAYTA DIOSGA caynömi nin:
 «Israel nasyun runacunaga aypallatanami mana allita rurasha.
 Chaypitami castigänillataga mana cachay-cushächu.

* ^{2:5} Ose. 8.14

Paycunaga juchaynaj alli runacunatami uyway
cananpaj ranticun.

Pobricunatanami ishcay llanguillawan rucan.

⁷ Pengaypaj ñacachin.

Umildicunataga arriglarpis jananpanmi.

Taytanpis, wamranpis chay jipashllawan cacun.

Chayno rurashpanmi juchaynaj caycaptë pengay-
man churaman.

⁸ Israelcunaga rindata chararashan röpacunata
mashtaycärimi

wegurpan idulucunapa ñaupancho rispitar micu-
nanpaj.

Multata págachishan guellaywanmi bïnuta rantin.

Nircurmi chayta upyan ‹diosnë› nishancunapa
templuncunacho.*

⁹ Ichanga chayno carcaycaptinpis nogami paycu-
nata päsachimunäpaj Amorreo runacunata
ushajpaj illgächirä.*

Ushajpämi wañuchirä sedru guerucunano jatun
caycajta, roble guerucunano sinchi caycaj-
tapis.

¹⁰ Israelcuna, gamcunatami ichanga Egiptupita
jorgamurä.

Amorreo runacuna tiyashan nasyunta gamcu-
nata goycunäpaj

chuscu chunca (40) watatarämi chunyajpa
pushamur chayachimurä.*

¹¹ Gamcunachöga waquinta churashcä profëtä
cananpaj.

Waquintanami acrarä nazareo* cananpaj.

* **2:8** Éxo. 22.26–27; Deut. 24.12–13 * **2:9** Deut. 3.8–11 * **2:10**
Éxo. 20.2; Deut. 8.2–16 * **2:11** Núm. 6.1–8

Israelcuna, ¿manachu chayno camacächirä?»
TAYTA DIOSMI chayno nisha.

- ¹² Mastapis Tayta Diosga nin:
 «Chayno caycaptinpis gamcunaga nazareo runa-
 cunata firsapita bünuta upuchishcanqui.
 Profëtacunatapis michashcanqui nogapa jutëcho
 mana willacunanpaj.
- ¹³ Chayno cashayquipitami aypallata cargasha ay-
 waycaj carräta pampata ñitirishannöpis
 gamcunataga ñitirishayqui.
- ¹⁴ May-jina cörrishpayquicunapis manami guesh-
 pinquipächu.
 Fiyupa callpayoj captiquipis manami callpayqui
 canganachu.
 Ni jinyunnin cajpis manami salbacongapänachu.
- ¹⁵ Lëchawan illapayta yachajpis manami illapayta
 camäpacongapänachu.
 Fiyupa cörriyta yachajpis manami gueshpen-
 gapänachu.
 Ni cawallunwan muntädu gueshpejpis manami
 salbacongapänachu.
- ¹⁶ Chay junäga fiyupa pillyay yachaj jinyunninpis
 galallami gueshpir aywaconga.»
 TAYTA DIOSMI chayno nisha.

3

*Castigu chayanapaj wallcallana pishiy-
 cashanta willacushan*

¹ ¡Wiyay Israelcuna! Egiptupita jorgamushoj
 TAYTA DIOSMI cayno nishunqui:

- 2** «Munducho aypalla runacuna caycajpitami gamcunallata acrashcä.*
 Acrasha caycaptë mana allita rurashayquipita gamcunataga castigashayquimi.»
- 3** ¿Manaraj alli parlacusha carga ishcaj runacuna purinmanchuraj?
- 4** ¿Manaraj cäsata charisha carga munticho liyun gaparämumanchuraj?
 ¿Manaraj machaynincho cäsata charar manta liyunpis gaparämumanchuraj?
- 5** ¿Mana ima micuytapis churapashaga pichiusa trampaman yaycunmanchuraj?
 ¿Mana imapis yaycuptenga chiclla churashan juchunmanchuraj?
- 6** ¿Manaraj pipis wañuptin wañushapänöna marcacho campanata tucanmanchuraj?
 ¿TAYTA DIOS mana camacächiptenga ima disgrasyallapis siudäman chayamunmanchuraj?*
- 7** TAYTA DIOSGA manami imaypis imatapis ruranchu sirbej profëtancunata manaraj musyacherga.*
- 8** Liyun wagamuptenga
 ¿piraj manchariyllawan mana sicsicyanmanchu?
 Willacunanpaj pitapis TAYTA DIOS niptenga
 ¿piraj mana willacunmanchu?*

Samaria illgänanpaj willacushan

* **3:2** Deut. 7.6 * **3:6** Job 2.10; Isa. 45.7 * **3:7** Gén. 18.17–19;
 Jer. 7.25; Dan. 9.10 * **3:8** Jer. 20.9; 1Cor. 9.16

9 Willacojcuna, gamcuna willacuy Asdod runacu-napa palasyuncunacho,
Egiptucho caycaj palasyucunachöpis.
Cayno niy: «Samaria jircacunaman shamuy-llapa,
fiyupa mana allicunata Samariacho ruraycajta ri-canayquipaj,
alli runacunata ñacaycächejtapis ricanayquipaj.

10 «Paycunaga alli cajta rurayta manami yachanchu.
Guechushancunallatami palasyuncunachöpis chararaycan.»
11 Chayno cashanpitami TAYTA DIOSGA cayno nin:
«Chiquishojcunami nasyunniquita curala-paycärengapaj.
Pacacunayqui caycajcunatapis juchurgärachengapämi.
Palasyuyquipitanami ima-aycatapis apaconga.»

12 TAYTA DIOSGA caynömi nin:
«Uywayoj runa imanömi liyunpa shiminpita guechun
uywanpa ishcay macshullanta u rinrincunallatapis,
chaynöllami Samariacho tiyaj Israelcunapis,
Damascupita rantimushan alli jamacunacho we-gurpajcunapis wallca cösallanwan gueshpenga.»

13 Munayniyoj TAYTA DIOSGA willacojcunata caynömi nin:
«Gamcuna wiay-llapa.

Jacobpita mirar aywaj Israel runacunapa contran willacuy.

¹⁴ Juchanpita Israelpita jusganä junäga
Betelcho caycaj altarcunata ushajpämi illgächej-
aywä.*

Altarpa isquüinancho caj wagrancunapis
paquicarmi pampaman shicwanga.

¹⁵ Jatusaj palasyucunatapis illgächishämi.
Achicyaypa achicyaycaj wasincunatapis illgar-
achishämi.

Llapan jatun wasincunatapis
juchurgärachishämi.»

TAYTA DIOSMI chayno nisha.

4

¹ Sumaj wiyy Samaria warmicuna.

Basán particho wäcacunano caycaj warmicuna
wiyyay cayno nishäta:

Gamcunaga pobricunatami ñacaycächinqui.

Pishëpacojcunatapis magar-ushaycanqui.

Runayquicunatana «Bínta apamuy upyanäpaj»
nircaycanqui.

² Rispitädú jutincho jurashpanmi TAYTA DIOS
cayno nin:

«Juc junajmi liyacurcur gamcunata apacushun-
quipaj.

Wamrayquicunatami aushicunawan janchacur-
congapaj.

³ Chauraga gatinayllanpami perga uchcucunapa
llojshinquipaj.

Hermonmanmi gargurishunquipaj.»

* **3:14** 2Rey. 23.15

TAYTA DIOSMI chayno nisha.

Tayta Dios rabyasha rimashan

⁴ «¡Betelcho caycaj capillaman mä ayway ä jucha ruraj!

¡Gilgalcho caycaj capillaman mä ayway ä mastä jucha ruraj!*

Uywata pishtarcur tutacunapa apay ä.

Cada quimsa junaj diesmuyquita apay ä.

⁵ Agradësicushpayqui lebadürayoj tantacunata ru-pachiy ä.

Nircur, chay goycushayquitaga pii-maytapis willa-pay ä.

Chayno ruraymi gamcunataga gustashunqui.»

TAYTA DIOSMI chayno nisha.

⁶ «Nogami camacächirä gamcuna yargaycho canayquipaj.

Nogami camacächirä tiyashayquicunacho micuy pishëshunayquipaj.

¡Chaypis gamcunaga manami nogaman yapay yäracamushcanquichul!»

TAYTA DIOSMI chayno nisha.

⁷ «Chaynöpis nogami camacächirä, micuycuna pogunanpaj

quimsa quilla pishiycaptillan usyacurcunanpaj.

Nogami camacächirä waquin siudächo tamyanan-paj,

waquin siudächöna mana tamyananpaj.

Waquin chacramanga tamyanaran.

* **4:4** Ose. 4.15; Amós 5.5

Mana tamyashan caj partichönami micuycuna
chaquiran.

8 Siudänin-siudänin runacunaga yacuta ashishpan
puriran.

Chayno ashirpis manami tariranchu yacunay-
cashanta chawächinanpäga.

¡Chaypis gamcuna manami nogaman yapayga
yäracamushcanquichu!»

TAYTA DIOSMI chayno nisha.

9 «Nogami gamcunata castigarä acaj wayrawan,
micuya ushaj curucunawanpis.

Camacächirä wertayquicunacho lantayquicuna,
übas yörayquicuna garwashtacäcunapanpäpis.

Chüpacacuna micur ushacurcuran ïgus
yörayquicunata, olivocunatapis.

¡Chaypis gamcunaga manami nogaman yapay
yäracamushcanquichu!»*

TAYTA DIOSMI chayno nisha.

10 «Egiptuman yurichishäno castigutami gamcuna-
manpis chayachimurä.*

Nogami camacächishcä gamcunacho caycaj
mösucuna guërracho wañunanpaj.

Camacächirä cawalluyquicunata chiquishojcuna
guechurishushpayqui apacunanpaj.

Nogami camacächirä pillyacho wañoj runacuna is-
mushan asyaytapis tiyarcaycashayquicho
mayanayquipaj.

¡Chaypis gamcunaga manami nogaman yapay
yäracamushcanquichu!»

* **4:9** Deut. 28.38; Joel 1.4–6; 2.4–9 * **4:10** Éxo. 9.1–6; 12.29;
Deut. 28.27, 60

TAYTA DIOSMI chayno nisha.

11 «Nogami gamcunata castigarä
Sodomatawan Gomorrata* castigashäno.
Chaymi gamcunaga caycarayqui ninapita jorgur-
isha tisunno.
¡Chaypis gamcunaga manami nogaman yapay
yäracamushcanquichu!»
TAYTA DIOSMI chayno nisha.

12 «Chaypitami cananga Israelcuna sumaj camar-
icuy tapuptë imata willamänayquipäpis.
Gamcunataga mas piyur-rämi casti-
gashayquipaj.»

13 Rasunpa chaynömi ruranga.
Tayta Diosga caycan puntacunatapis camajmi,
wayratapis yurichimojmi.
Paymi runacunata musyachin imata pay yarpay-
cashantapis.
Paymi achicyajtapis ticrachin chacayman.
Paymi purin cay pachachöga intérupa.
Paypaga jutinpis munayniyoj TAYTA DIOSMI.

5

Arpinticunapanaj willapashan

- 1** Canan rimaycämushäta sumaj wiယacuy Israel-
cuna.
Gamcunapanaj fiyupa llaquicur parlaycämushäta
wiယaycäriy ari.
- 2** Israelga runa yatänillaraj caycarmi mana alliman
chayasha.

* **4:11** Gén. 19.24

Chaypita alli cashanmanga mananami cutenganachu.

Quiquinpa marcallanchömi mashtarpaycar quëdasha.

Pipis manami canchu mashtarpaycajta jatarachinampäga.

³ TAYTA DIOSGA Israelcunata caynömi nin:
«Juc siudäpita waranga (1,000) runacunata pillyaman cachaptin,

pachacllanami (100) cutimonga.

Juc siudäpita pachac (100) runacunata cachaptin chuncallanami cutimonga.»

⁴ TAYTA DIOSGA Israelcunata caynömi nin:
«Nogaman shacamuy-llapa. Chauraga cawanquipämi.

⁵ Ama aywaychu Betelcho caycaj capillamanga.
Ama aywaychu Gilgalcho caycaj capillamanga.
Chayno, amana päsaynachu Beersebacho caycaj capillamanpis.

Gilgalcho tiyajcunataga simrimi prësu apanga.
Betelnami ushajpaj ragällan quëdangapaj.»

⁶ TAYTA DIOS munashanno rurarga cawanquimillapa.

Mana wiyacuptiquimi ichanga ushacächicojcunata Pay cachamonga Israelcuna tiyarcaycashanman.
Chaura Betelchöga manami pipis cangachu mana allicunapita salbananpaj.

⁷ Ay wawallau, gamcunaga laycunata mana allimanmi ticrachinqui.

Nircurpis manacajmanmi churanqui.

8-9 TAYTA DIOSMI ichanga chacayta junajman ticrachin.

Junajtapis yanauyaycaj chacayman ticrachin.

Paymi ruraran «Pléyades» nishan, «OrIÓN» nishan goyllarcunatapis.

Paymi gayan lamarcho caycaj yacucunata, nir-corga allpa jananmanna machirin.

Tayta Diosmi camacächin pacacuna siudä illgänanpäpis.

Chaynöpami mana allita chayachimun curalasha caycaj siudäcunaman.

Paypa jutenga TAYTA DIOSMI.

10 Israelpuna gamcunaga dimanduta alli arriglaj cajta chiquinquimi.

Rasun cajta rimaj testígutaga manami rimanan-tapis munanquichu.

11 Gamicunaga pobricunata manacajmanmi churrarcaycanqui.

Rígupitapis impuestuta págashunayquipämi nircay-canqui.

Chayno cashayquipitami mana tiyanquipächu llagllasha rumicunapita wasicunata rurashayquichöpis.

Chayno, manami upunquipächu bïnutapis lan-tashayqui übas wayushantaga.

12 Noga musyaycämi maychicata mana allicunata rurashayquitapis.

Musyaycämi juchata rurashayquicunata.

Juchaynaj alli runacunata ñacarcaycächinqui.

Págashushayqui saynitapis pacayllapa chasquiy-canqui.

Autoridäcunapa despächunchöpis pobricunapa di-manduntaga mana bälchinquichu.

¹³ Chaymi yachaj runaga upälla cucun, chay wican fiyupa mana alli captin.

¹⁴ Alli cajta ruray, ama mana alli cajtaga. Chauraga cawanquipämi.

Chayrämi rasunpa canga gamcuna cayno nishayquega:

«Munayniyoj TAYTA DIOSMI nogacunacho caycan» nir.

¹⁵ Mana alli cajtaga chiquiy. Alli cajtaga cuyay.

Gamcunaga yarpay despächucunachöpis alli arriglayta.

Chaura munayniyoj TAYTA DIOSGA capaschari cuyapaycushunquimanpis quëdasharaj caycaj Israelcunata.

¹⁶ Munayniyoj TAYTA DIOSGA caynömi nin: «Läsacunachömi wagay canga.

Cällicunachömi llaquicuypita gaparpanga.

Chacraccho arojcunatapis gayanga wagäshinanpaj. Pägapaj wagapacojcunatapis gayanga.

¹⁷ Übas chacracunachöpis intéruchömi waganga. Chaynömi canga noga castigaj shamushä örapis.» TAYTA DIOSMI chayno nisha.

¹⁸ ¡Ay imanöraj canga, TAYTA DIOS shamunan junata shuyarpaycajcuna!

¿Gamcunaga musyaycanquichu gamcunapaj imano chay junaj cananpaj cashantapis?

Achicyaj cananpa ruquin chay junäga cangapaj yanauuyaycaj chacaymi.

- 19** Chay junäga canga, juc runa liyunpita gueshpiy-cashancho ösuwan tincupurajnömi.
 Man'chäga gueshpir wasinman yaycurir pergaman guellicuycoja culebra cañiyushannömi.
- 20** Au, rasunpami TAYTA DIOS shamunan junäga canga fiyupa chacay, mana achicyaj.
 Chayga canga fiyupa yanauyaycaj chacaymi, mana imapis ricacajmi.
- 21** «Noga Tayta Diosga fiyupami melanäcö gam-cuna rispitädu fistata rurashayquicunata.
 Aduramänayquipaj shuntacashayquipis manami gustamanchu.
- 22** Manami munächu rupachina sacrificisyucunata nogapaj pishtashayquitapis,
 ni chaqui micuy ofrendacunata goycamashayquitapis.
 Nogaga manami chasquishäpächu werannin törmallwacunata alli goyaypita sacrificisyupaj pishtaptiquipis.*
- 23** Noga wiyanäpitaga juc-lächo cantacuy chay alabansayquicunata.
 Arpayquicuna wagashantapis manami wiayta munächu.
- 24** Ichanga noga munä allita ruranayquitami.
 Alli arriglanayquitami munä.
 Imaypis mana chaquej limyu yacunöraj alli cajta ruray ari.*
- 25** «Israelcuna, chuscu chunca (40) watantin chunyaj chaqui jircapa pushamuptë ¿imaytaj

* **5:22** Isa. 1.11–14 * **5:24** 1Sam. 15.22; Prov. 21.3; Jer. 7.22–23;
 Ose. 6.6; Miq. 6.6–8

nogapaj uywacunata pishtarayqui, u chaqui micuycunata garamarayqui? ²⁶ Chaypa ruquenga «raynë» nishayqui Sicut-ta aparisha purichej canqui. «Quiyún» goyllartapis aparisha purichej-canqui. Chaycunataga «diosnë» nir quiquipucunami ruracarcärirayqui. ²⁷ Chaypitami gamcunata jitarishayquipaj Damascupita mas carucho caycaj chunyaj chaqui jircaman.»* Chayno rurashunayquipäga niycan TAYTA DIOSMI. Paypaga jutinpis munayniyoj TAYTA DIOSMI.

6

Israel illgänanpaj cashan

¹ ¡Ay imanöraj canqui Sioncho goyaj autoridäcuna! ¡Ay imanöraj canqui Samariacho tiyaj mandajcuna!

Gamcunaga charashayquiman yäracurmí munayniyoj-tucurcushcanqui.

Gamcunamanmi Israelcunaga «yanapämäy» nir aywarcaycämun.

² Calne siudäta aywar mä ricamunqui.

Chaypitaga pásar chayanqui Hamat jatun siudäman.

Chaypitana uranqui Filisteacho caycaj Gat siudäman.

¿Chay nasyuncunacho tiyaj runacunapita mas bäléjchuraj gamcunaga canqui?

¿Gamcunapa nasyunriquega chay nasyuncunapita mas allichuraj?

* **5:27** Hech. 7.42–43

- 3** Gamcunaga fiyupa ñacay junaj chayamunan-paj caycajta manami yarpayllapis yarpan-quichu.
 Chaypis mana allita rurar masmi gayaycanqui chay ñacay junajta.
- 4** Cuyayllapaj llagllaypa adurnasha jamanacho wegurpaycanqui.
 Fistata rurar cushicushpayqui goyaycanqui.
 Carni-mallwacunata, werannin töru-mallwacunata micur jamarpaycanqui.
- 5** Arpacunatapis wagay-wagayllataraj tucarmi birsucunatapis mushojcunallata jorguycanqui.
 Instrumentucunatapis Davidnörämi tucuy-nirajta ruraycanqui.*
- 6** Jatusaj cöpacunawan bïnuta upyarcaycanqui.
 Cuerpuyquicunamanpis allinnin perfümicunataraj pichucuycanqui.
 Nasyunniqui mana alliman chayaycashanpäga manami imapis gocushunquichu.
- 7** Chayno cashayquipitami gamcunataraj ñaupa-puntataga juc-läman prèsu apashunquipaj.
 Fistata rurar gaparpashayquicunapis manami musyacangapänachu.
- 8** TAYTA DIOSGA quiquinpa jutinchömi jurasha.
 Munayniyoj TAYTA DIOSGA caynömi nin:
 «Jacobpita mirar-aywajcuna alli-tucushanga fiypami rabyachiman.
 Palasyuncunatapis melanäcömi.
 Chaypitami paycunataga siudänintinta cachapaycushaj chiquejcunapa munayninman.»

* **6:5** 1Crón. 23.5; Neh. 12.36

9 Chay öraga juc wasicho chunca runacunalla cawaycar quëdasha cashpanpis llapanmi wañonga. **10** Chaura juc familyan ayata pampananpaj wasiman chayanga. Wasi ruricho caycajtana taponga: «¿Pillaga gamwan chaycho caycanrächu?» nir. Chaura ruripita nimonga «Manami pipis cashachu» nir. Mastapis ruripitaga nimonga: «Upälla. TAYTA DIOSPA jutinta rimarpis rimaycunquimanchari. Chauraga castigarpis castigaycamashwanchari» nir.

11 TAYTA DIOSMI camacächenga jatunpis tacshapis wasicuna juchunanpaj.

Chauraga llapanmi illgangapaj.

12 ¿Cawallucuna purinmanchuraj gagapa?

¿Gagacho yapyashwanchuraj?

Chaura ¿imanirtaj gamicunaga layta benënumanno ticrachishcanqui?

¿Imanirtaj autoridäcuna alli arriglananpaj cajtapis ticrachishcanqui fiyupa ashgajmanno?

13 Gamicunaga manacajcunallapitami alabacuy-canqui.

Munayniyoj cashayquipitami alli-tucur puriycanqui.

14 Cananga sumaj tantiyacuy Israelicuna.

Munayniyoj TAYTA DIOSGA caynömi nin:

«Nogami camacächishaj juc nasyun runacuna shaycamur fiyupa ñacachishunayquipaj.

Chaycunaga llapaniquitami ñacachishunquipaj

Hamatman yaycunapita-pacha gallaycur asta Arabá mayucama» nir.

7*Chüpamacunata ricachishan*

¹ TAYTA DIOS ribilamashpan caynömi ricachimaran: Ray coséchata rurashanpitara, micuy garwaraycashan wican, ricarä Tayta Dios aypalla chüpamacunata miraycächeja.*
² Chay chüpamacuna llapan guewacunatana micur ushaycaptin nogaga ruwacurä: «TAYTA DIOS, nogacunata perdunaycamay ari. Mana perdunaptiquega ¿imanöraj canga Jacobpita mirajcuna? Paycunaga caycan wallcajlla quëdaj runacunami.»

³ Chaura TAYTA DIOSGA cuyapashpan niran: «Chaynöga manami cangapächu,» nir.

Fiyupa shanayta ricachishan

⁴ TAYTA DIOS ribilamashpan caynömi ricachimaran: Ricarä runacunata castigashpan TAYTA DIOS fiyupa acaj shanayta shanaycächimoja. Chay shanayga ushajpaj chaquirachiran pacha rurinpita pashtamoj yacutapis. Chayno chaquiyächiran chacracunacho caj jachacunatapis.*

⁵ Chaura noga ruwacurä: «TAYTA DIOS amana chaynöga ruraynachu ari. Chayno castigaptiquega ¿imanöraj canga Jacobpita mirajcuna? Paycunaga caycan wallcajlla quëdaj runacunami.»

⁶ Chaura TAYTA DIOSGA cuyapashpan niran: «Chaynöpis manami cangapächu» nir.

Plomädata ricachishan

* **7:1** Joel 1.4; 2.2–11 * **7:4** Joel 1.19–20

⁷ Tayta Diosga ribilamashpan caynötapis ricachimaran: Payga caycaran perga läduncho. Albañil charashan plomädata jancharayacaran.
⁸ Chaymi pay tapumaran: «Amós, ¿imatataj ricaycanqui?» nir.

Nogana nirä: «Albañilpa plomädantami Tayta» nir.

Chaura Pay nimaran: «Cananga albañilpa cay plomädawanmi musyashaj Israelpuna imano caycashantapis. Juchanpitaga manami masga perdunashänachu. ⁹ Íduluncunata adurananpaj rurashan capillancunatapis illgächishämi. Sablëta aptacurcurmi aywashaj Jeroboampa familyancunata illgarachinäpaj.»

Cüra Amasías Amoswan rimanacushan

¹⁰ Betelcho caj cüra Amasiasga Israelpa raynin Jeroboamta cayno willachiran: «Amosga cay Israelpo puriycan gampa washayqui rimarmi. Noganchëga manami awantashwannachu chayno rimashanta. ¹¹ Payga puriycan cayno nirmi: ‘Jeroboamga sabliwanmi wañonga. Israelpunatanami nasyunninpita fiyupa caruman prèsu apanga’ nir.»

¹² Chaypitaga Amosta Amasías niran: «¡Willacoj profëta, caypita aywacuy! Willacuypa gänayta munarga Judäman aywacuy. ¹³ Cay Betelchöga ama willacuynachu. Caychöga caycan raypa templunmi. Caymanga nasyun intëru runacunami shuntacämun.»

¹⁴ Chayno niptin Amós niran: «Nogaga manami profëtachu cä. Ni profëtapa disipulunpischu cä. Nogapaga cawanäpaj uywäcuna canmi, ígus chacräcunapis canmi. ¹⁵ Chayno uywäcunata

ricar goyaycajtami TAYTA DIOSGA cayno nimasha: «Ayway. Acrashä Israel runacunata nogapa jutécho willapay» nir. ¹⁶ Chaymi, canan gamga sumaj wiyamay willanäpaj TAYTA DIOS nimashanta. Gamga caynömi niycanqui: «Ama willacuychu Israelpa contranga. Isaacpita mirar aywajcunapäga ama imatapis parlaychu» nir. ¹⁷ Chaypitami gamtaga TAYTA DIOS cayno nishunqui: «Jinan siudächömi warmiqui mañösaman ticrar jucwan-jucwan cacongapaj. Wamrayquicunana ollgupis warmipis sabliwan wañonga. Chacrayquicunatana surtita jitashpan raquipänaconga. Quiquinami wañunquipaj Diosta mana rispitajcuna tiyashan nasyuncho. Israelcunatanami nasyunninpita fiyupa caruman prësu apanga.» »

8

Canastacho pogusha caycaj frütacunata ricachishan

¹ TAYTA DIOS ribilamashpan caynötami ricachimasha: Juc canastacho pogusha frütacuna caycaran. ² Pay tapumaran: «¿Imatataj ricaycanqui Amós?» nir.

Chaura noga nirä: «Juc canastacho frütacuna pogusha caycajtami» nir.

Chaura TAYTA DIOS nimaran: «Israel runacunaga pogusha frütanönami caycan. Chaymi juchanpita mastaga manana perdunashänachu. ³ Chay castiganä junäga achcajmi wañonga. Wañojcunataga pacayllapami juc-läman jitariycärenga. Chaymi palasyucho cushicur cantananpa ruquenga

llaquicuypitana wagayman churacangapaj.»
Chayno cananpämi TAYTA DIOS nisha.

⁴ Imano cashayquitapis wiay-llapa.
Gamcunaga umildicunatami ñacaycächinqui.
Nasyunniquicho pobri caycajcunatami
engañayanqui. ⁵ Gamcunaga cayno niycanqui:
«¿Imayraj ushacanga cay llullu quilla fista
rígunchüta ranticunanchipaj? ¿Imayraj ushacanga
jamay-junaj, chaqui micuyninchicunata
chanincho ranticunanchipaj? Pishej tupullawan
tupushun. Suwa pësallawan pësaypa ranticushun.*
⁶ Rígupa shojmapancunallatapis ranticushun.
Pobricunataga rantishun. Pishipacojcunatana
juc par llanguipa ruquin charicurcushun»
nir. ⁷ Chaymi TAYTA DIOSGA Jacobpita mirar-
aywajcunapa jutincho cayno jurasha: «Imanöpis
rurashantaga manami imaypis gongaycushächu»
nir.

⁸ Israelpuna chayno llutanta rurashanpitaga
¿manachuraj cay pachapis wac-läman cay-
läman cuyurenga?

Imanömi Nilo mayupis achcayan wallcayan,
chaynömi cay pachapis jogaricangaraj ucrucan-
garaj.

Chayno ruraycaptenga ¿manachuraj chay nasyun-
cho llapan tiyajcuna waganga?

⁹ TAYTA DIOS nin: «Chay nishä junajmi
camacächishäpaj inti las-dösicho caycaptin
pacha chacacäcunanpaj.

* ^{8:5} Lev. 19.35–36; Deut. 25.13–16; Prov. 11.1; 20.10, 13; Miq. 6.10–11

Pullan junaj alli achicyaraycaptinmi
camacächishaj intëru mundupa chacay
ricacunanpaj.*

10 Fistata rurashancunatami ticrachishaj
täpacuyman.

Wañojcunapänami cantangapis.

Lütu röpatana jaticachishaj.

Llaquicushan musyacänanpaj ajchanta
rutucachishaj.

Japallan wamranta ograycushanörämi waganga.

Llapanpis canga pasaypa llaquicuyllami.»

11 TAYTA DIOSMI nin: «Cay pachamanga chaya-
mongapämi fiyupa muchuy cananpaj juna-
jcuna.

Manami micuypita muchuychu canga; ni yacu-
naypischu canga.

Chaypa ruquin TAYTA DIOSPA willacuyninta
wiayta munarmi muchuycho caycajnöpis
ashenga.

12 TAYTA DIOSPA willacuyninta wiayta munash-
pan runacunaga intérupami purengapaj.

Lamarpa juc cuchunpita juc cuchuncamami ay-
wanga.

Wacpa caypapis ashir purenga.

Ni maypa aywashpanpis manami taren-
gapänachu.

13 Chay junäga yacunaypita chiyacäcongapärämi
cuyayllapaj camaraj jipashcuna, jinyu
mösucunapis.

14 Mana allimanmi chayangapaj Samariacho caj
ïdulupa jutincho jurajcuna,

* 8:9 Joel 2.10

Danpa Diosninpa jutincho jurajcuna,
 Beersebapa diosnincunapa jutincho jurajcuna.
 Paycunaga imaypis manami alliman
 chayangapänachu.»

9

Tayta Dios jusgananpita pipis mana gueshpinanpaj cashan

¹ Tayta Dios ribilamaptin payta ricarä altarpa ñaupancho ichiraycajta. Paymi cayno niycaran:
 «Pilancucunata tacay, chayman jamaraj numral-cuna cuyurinanpaj.

Chaymi juchur runacunapa jananman shicwamonga.

Gueshpejcunatapis sabliwanmi wañuchishaj.

Imanöpa gueshpiyta munashpanpis manami ni jucnayllapis salbacongapächu.

² Allpa rurinman may ruriman pacacuptinpis, chaypitapis jorgamushämi.

Syëlu may altocho caycajman wichertinpis, chaypitapis urächimushämi.*

³ Carmelo puntaman pacacuptinpis, chaymanpis ashej aywashämi.

Nogapita gueshpir lamar yacu rurinman pacacuptinpis,

cachashaj lamarcho tiyaj waräcuytami tarircur rachir usharinanpaj.

⁴ Chiquejcuna prësu apaptinpis nogami camacächishaj sabliwan wañumunanpaj.

* ^{9:2} Sal. 139.7–12; Jer. 23.23–24

Paycunataga ricapaycäshaj manami
yanapänäpächu, chaypa ruquenga
castiganäpämi.»

5 Munayniyoj TAYTA DIOS cay pachata yataycuptin
cay pachaga chullucäcunmi.

Imanömi Nilo mayupis achcayan y wallcayan,
chaynömi cay pachapis jogaricangaraj ucrucan-
garaj.

Chayno ruracaptin chaycho tiyajcunaga fiyupami
wagangá.

6 Tayta Diosga janaj syëluchömi camacächisha
tiyananta.

Cay pacha jananpanami asulyaraycajta
camacächir tacyachisha.

Quiquin Tayta Diosmi gayan lamarcho cayc妖
yacucunata.

Nircorga chajchurin intëru allpa jananman.

Paypa jutenga TAYTA DIOSMI.

7 TAYTA DIOS caynömi nin:
«Israelpuna, nogapäga llapaniquipis iwal-llami cay-
canqui gamcunapis Etiopía runacunapis.

Imanömi gamcunata Egiptupita jorgamurä
chaynömi Filistea runacunatapis Creta partipita
jorgamurä.

Aram runacunatapis Kir partipita jorgamurä.

8 Nogaga ricaycämi gamcunapis juchasapa cay-
cashayquita.

Chaypitami nasyunninpa ushajpaj illgächishayqui.
Ichanga quëdaj cajcunata mananami
illgächishäpänachu.

Noga TAYTA DIOSMI chayno në.

⁹ Nogami camacächishäpaj gamcunataga shuyshu-cunawan ríguta päjanpita shuyshojno tap-sishunayquipaj.

Päjano cajcunaga manami ni jucnayllapis quédangachu.

¹⁰ Acrashä runacunacho juchayoj cajcunaga llapanmi wañonga.

«Manami imapis chayamäshunchu» nejcunaga llapanmi wañonga.

Shamoj watacunacho Israel allina cananpaj cashan

¹¹ «Chay nishä junaj chayamuptenga Davidpita mirajcuna yapay Israelcho mandananpämi camacächishaj. Davidpa wasin tunisha caycajta yapay jatarachishaj. Üchcuncunata chapashaj. Pergancuna juchusha caycajta pergashaj. Chauraga unay cashannömi yapay canga. ¹² Chauraga Edom runacuna chararaycashan parti, waquin nasyuncuna chararaycashan partipis yapay canga Israel nasyunpa munayninchöna.» Chayno cananpämi TAYTA DIOS nisha. Nishantaga cumlengami.*

¹³ Tayta Diosmi nin: «Shamoj watacunachöga caynömi canga: murupacuy caycashan wichanpis jinallarämi rígu cosécha caycanga. Bínupaj übas lluchcayta manaraj ushaptinpis rígu murupacuya maynami caycanga. Bínú aypalla cashpanmi jircacunapa, patacunapa yacu aywajnörat canga. ¹⁴ Chayrämi prësu apashanpita cutichimushäpaj acrashä Israel runacunataga. Juchuchisha caycaj siudäcunatapis yapay allchanga. Nircur chay siudäcunacho

* **9:12** Hech. 15.16-18

tiyanga. Übastapis lantanga. Poguptinnami
bïnuta rurarcur uponga. Wertacunata ruranga.
Wayuynincunatana miconga. ¹⁵ Quiquinapa
chacranman cutiycachimur jamachishäpaj.
Chay goycushä chacrapitaga manami imaypis
jitarengapänachu.» Chayno cananpämi TAYTA DIOS
nisha.

**Tayta Diosninchi Isquirbichishan
New Testament in Quechua, Huallaga Huánuco**

copyright © 2011 Wycliffe Bible Translators, Inc.

Language: Huallaga Huánuco Quechua (Quechua, Huallaga Huánuco)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789972985836

The New Testament

in Quechua, Huallaga Huánuco

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
d79b7f64-85d7-5082-9370-8f7fc68bcd85